



宋蔡忠惠文集卷之三十三

明後學吳興蔡善繼伯達甫校

碑誌表碣

光祿少卿方公神道碑

方姓周方叔之後東漢紘避地丹陽因居歙縣世爲豪長唐泉州刺史取述者紘之苗裔歙睦最近公之六世祖唐季之亂由睦州徙家泉州興化縣曾祖諱京仕僞唐爲清源長史祖諱守禮漳州漳浦縣主簿有詩三百篇曰仙巖集父諱鼎太平興國初陳忠順

王以其地歸朝廷卽泉之莆田立興化軍又徙爲莆田人累贈工部侍郎公諱偕字齊古少聰警十四能爲文詞薛公奎知縣事公以文見薛意其少年倩詞於人延坐令作賦一篇立就薛公器其遠至二十進士及第授溫州軍事推官校其州之進士州守以客不私託公曰貢舉無容私出之守導客訴于監司覆校不私守以是免罷歲大饑民有欲隸官軍以就廩食而兵有定數呂公夷簡爲提點刑獄公白之曰溫民饑且死勢將聚而爲盜豈若署壯強以尺籍且消

患於未萌而公私交利乎呂卽移文於州縣點七千人再調漣水軍判官部有浮屠人曰婁道者能以術却寒暑驚眩民俗所至受施金繒無量其徒以高貲爲姦橫公密捕一夕輒病死沒入其財而逐其黨轉運使梁楚聞公材能每委以難事因而保薦代還吏部銓將上舉者姓名或諭公曰保章固多宜置梁楚宰相之所甚惡者公曰梁知我者倖遷而置之吾不爲也及績最上中書丁謂果沒之又爲汀州軍事判官唐公肅使福建建之建安訟日數十百命公權泣

旬月之間至於閒靜縣筦茶山先社集民數千噪山谷申助達陽氣以發茶茗公曰害吾農時而作無益耶是歲不用後亦遂止丁侍郎憂去官外除改著作佐郎知福之福清吏質衣以自給人至今頌之徙監南劍州石牌場月入白金三萬兩就遷秘書丞久之徙知資州資陽縣遷太常博士未行喪太夫人行服景祐二年遷尚書屯田員外郎御史中丞杜公衍判審官院與公無雅故因視閔閱曰唐公高潔於人少可今力慰薦如此子之才行可知已會被詔舉屬官

卽乞公殿中侍御史朝廷以實無資歷不如詔又請御史裏行其官久廢罷之杜公奏曰臣所知者無如方某卽不如例願令他官舉薦於是除推直官雷孝傑知代州貪贓不法屢鞠失實公馳驛往劾卽正其罪還見賜緋衣銀魚澧州逃卒從民李某就傭而歛其直遂誣其家事摩馳神歲殺十二人以祭州捕其族三百人荐棘於州門獄久不決詔遣治之公詰之曰必得被殺者主名乃疏其姓氏鄉縣移問所疏或存或亡悉有根柢無見殺者告者伏法御史知雜事

龐公籍薦爲殿中侍御史裏行二年卽真命又遷侍御史使南都降慮獄囚時鴻慶宮災將議脩復公引漢唐罷原廟故事疏勿復治以答天戒元昊叛邊寇塞門塞鄜延路副都部署趙振閉城不救塞門沒賊大帥言振畏懦當寘於法公將命按問振以逗撓其當棄市公入爲上言振兵衆寡不敵出亦爲餌矣振得不死流竄改開封府判官時西兵未解軍資百出取辦臨時民苦不聊朝廷遣使四出以安撫之公往江南東西陞辭之日日民所甚急者行而後奏事大

而緩者請以須報庶乎惠澤速逮於下也比至去貪暴薦循良數十人平寃决滯訟威動所部先時轉運使第民產高下給以乳香令其輸絹民輸之絹而吏奪其香率空手去三司出錦綺之類下州郡鬻之促期歛錢而帛無所用公一切罷絕而上其爲害之狀轉運使坐免其恤民疾宣風旨率多此類入爲三司判官使契丹復命拜兵部員外郎兼御史知雜事判大理寺賜金紫糾大臣之不循禮法者數人九十六日擢副三司度支是時江淮發運使與諸路轉運

使事皆違異歲漕闕其舊常除公天章閣待制充使
江淮東南乃辦發運以近侍處之自公始也移知杭
州杭於吳最爲繁穰公時與賓從載酒殺鳴絲管周
遊湖山之間踈訟至前談笑遣之若無可爲治者二
年未嘗有留獄遷刑部郎中以疾得太常少卿分司
西京祀明堂恩爲光祿卿歸休里閤至和二年七月
二十七日終于家年六十四詔中使賙贈明年正月
八日葬候官村之靈隱山公嚴明潔廉察民情數民
事尤剗益以精敏其下少欺必撻之惕惕畏伏在三

司開封每議刑平獄鈎簿領通財利率有條理後以
爲法性樂人善汲引後進常若不及生平所任保二
百餘人多顯達者尤善飲酒遇酒聰明過於常時知
福清吏乘醉白事明日覆之吏隱其一公曰有某事
在吏叩頭謝使契丹其王酌大金瓢屬之曰此所以
侑勸也公不辭酌之契丹大驚喜遺以名馬號其器
爲方家瓢云母王氏贈太原郡太君妻陳氏封安定
郡君故祕書丞諱靖之孫女也子四人浹漳州長泰
令洽守將作監王簿蚤亡沃太常寺太祝澤郊祀掌

坐女七人適劉孝先陳勵王拱並進士官州涇縣尉
鄭伯齊福州連江縣尉李昭文二人尚幼浹既克葬
乃以書載公之官籍拜除卒葬之歲月請於某曰先
君之於法有碑其文將誰託乎某謹序而銘之曰
任職於朝志不上屈作政于藩勢必已出臨劇以簡
明謹惟刑爲利以寬矜恤惟民要望是更法從之聯
何命之嗇疾其末年壽兮必終德則滋久銘以著之
唯公之有

太常博士致仕胡君墓誌

胡氏世居長安詢爲唐兵部尚書其孫韜因亂留蜀
爲僞蜀陵州刺史蜀平歸京師終衛尉卿於君爲曾
祖生泰州司寇參軍諱脩已卒葬海陵司寇生寧海
軍節度推官諱訥贈太子中允博學善屬文呂文靖
公夷簡嘗薦其書備修國史君其長子也諱瑗字翼
之少有氣節頽意經學兼通律呂之法力貧以撫兄
弟之孤愛義良厚景祐中范文正公仲淹上言君知
古樂召見論樂拜試秘書省校書郎康定初元昊寇
邊陝西帥以辟爲丹州推官後移密州觀察推官丁

父憂舉其族之亡於遠者九喪歸塋服除遷保寧軍節度推官治湖州州學又召教授諸王宮病家辭免遂以太子中舍致仕泛恩改殿中丞驛召會秘閣議樂除大理評事兼太常主簿尋復解罷歲餘授光祿寺丞國子監直講仍與議樂樂成改大理寺丞賜緋魚嘉祐元年遷太子中允充天章閣侍講既而疾不能朝拜太常博士還官政從其子志康杭州節度推官以就養四年六月六日終于杭州享年六十有七明年十月五日葬於湖州烏程何山之原母隨氏贈

京兆縣太君娶王氏封長安縣君有子三人志康進士及第志寧志正皆力學長女婚大理寺丞滕希魯次進士王伯起季女尚幼孫守約君孤進所立不恤權貴義以自信本朝承周用樂其聲高不合中和太祖皇帝嘗詔下一律而未遑制作天子知樂命李照等修之君初得對崇政廷辨照等所修樂非是詔令改作未幾報罷及會秘閣議按周禮以正鐘律用上黨黍列爲九等繫其中者爲尺尺定而律成驗之比舊下一律於是徹前樂而新之天子臨紫宸鐘磬在

廷天子曰學者能通典故而不能知聲工者習其聲之傳而不知制器之理斯雖能也先有議鑄鍾當有大小今與黃鐘一之非古制乃用倍半之法作應鍾至是鍾成特小小者不堪備宮縣諸儒侍從無異議者天子可之用於郊廟又令作皇祐新樂圖記布之天下蓋積二十年而後成其間同議論皆貴官老儒相抵止者豈一二哉然君未始恤之也尤患隋唐已來仕進尚文詞而遺經業苟趨祿利及爲蘇湖二州教授嚴條約以身先之雖大暑必公服終日以見諸

生設師弟子之禮解經至有要義懇懇爲諸生言其所以治已而後治乎人者學徒千數日月括廟爲文章皆傳經義必以理勝信其師說敦尚行實後爲大學四方歸之庠舍不能容旁拓步軍居署以廣之五經異論弟子記之自爲胡氏口義侍邇英講不以諱忌爲避旣疾上數遣中貴人就問安否蓋亦有所待矣比去京諸生詣闕下乞留者累日公卿祖送都門甚盛莫不惜其行也君雖老於訓導在丹州實與帥府事建議更陳法治兵器開廢地爲營田募土人爲

兵給錢使自市勁馬漸以代東兵之不任戰者雖軍校蕃酋亭障廝役以事見輒飲之酒訪被邊利害以資帥府府多武人初謂君徒能知古書耳既觀君之所爲不以異已又翕然稱之君雋材而行篤卒艱勤以殷所著資聖集十五卷藏於家嗟乎士之有志於道以身法世莫不欲致之於用推之於遠然才德之士多亦蹇軋難通豈不有命乎君不鄙小官進不及用功於誨人其施博矣晚乃得侍天子左右若將有爲輒病以廢豈人事也哉謹誌

尚書虞部員外郎尹公墓表

公諱仲宣咸平三年明經登第歷梓州銅山鳳翔麟遊二簿調永興司理參軍又爲潞州襄垣主簿遷汝州梁縣懷州武陵二令又遷蜀州軍判官薦公之行能於朝者十數人由是除大理寺丞又四遷爲尚書虞部員外郎歷知汝州葉鄭滎陽二縣又知大寧監通判華州華州由知資州最後知郢州以景祐四年三月七日卒于官春秋七十一公之爲治應事輒決未嘗迎立科指辨詞周復細民自得盡其情實然慈

怨雖發見巧僞不忝置之淡法所至之州若縣其人至今皆曰尹思公爲我主曲直寧可得也其尤著明者許州進士朱公祐嘗遊資州當是時公初卒資州聞之鄜巷傳道老穉相扶攜涕泣入浮屠宮哀號弔問道交踵往來數日而後已公祐於公父子間無平生之舊美公愛於資遂記之以傳於人曰遺愛錄云嗚呼公乎其厚德者歟古者太守刺史權大官久能以威惠滋其下故時有思者今之爲郡需三歲輒更罷去事小大率有法令雖材者巧摘奇斷立威刑以

爲強名然其居也民畏之去則已矣公平易不設垣塹悉驅所治之民而內之俾其自安公存無能指引一二事以稱說及其終乃懷思無窮豈非盡其中者其迹愈隱而其感益深乎公始至郢州以書語其子洙曰吾州土風和民俗厚所治有池臺榭石觀遊之美可以休吾心焉終此觀吾老矣署事始三日蚤作被疾比呼醫至已大劇志莫克遂可悲也已公之先世居太原祖某贈光祿卿塋河南壽安其後子孫遂居河南考文化仕至尚書都官郎中以才能名當

時累贈刑部侍郎母鄭氏追受德興縣太君夫人張氏壽安縣君以賢德稱於內外族前公七年卒子男源洙湘沖淑沂澄七人源洙澄皆中進士科湘以蔭補官沖淑並蚤亡沂尚幼公之卒明年十一月從塋祖考之兆其孤謂某曰歐陽永叔旣銘吾先君子之行藏壙中冀千萬年以永存子且無詞慰予哀乎某謹次其始末用考信於後人其年十二月日刻石以表于墓下

楊公明墓表

予友楊公明景祐元年登進士第籍名下吏部銓將補官輒病其年某月日終于京師其友張平叔用浮屠法火之而歸其家以其年月日塋于阜洋之北山嗚呼人孰不貴子之祿不逮其身人孰不壽子之年止於二十有七天乎命耶予莫得而悲之惟子之志不得伸而利於人者最可悲也予幼學於鄉序及長舉進士與公明並研席者數年公明居一室方牀環列冊書而飲食寢休於其中蚤夜讀誦不休群居談噓終日過耳若無人笑語者於是博通經史予觀公

明而自省日益脩勵卽戲言小失亦媿公明之知者
予之道獲益於公明也久矣間嘗語予曰今世取士
失其方而仕者多所矜伐智詐以爲材能位通祿厚
侈心夸欲縱肆使其風流霑染於下媿靡敗爛我曹
儻得志正當立誠苦節以代磨世俗予甚噫其言而
未知其爲利之博也自予入官奔走四方遊京師觀
世俗態狀益思其所以語我者嗚呼公明亡矣予思
其言則矍然檢已之所爲使公明且存其規我者豈
少哉此所以不獨爲今世惜也公明諱暈五代祖某
唐末因官入閩兵亂不還畱居泉州之惠安縣父處
士君輔以善行隱於鄉妻陳氏一男尚幼嗟乎公明
之不顯匪予誰咎詞以紓哀刻之墓下後千萬年指
此丘曰賢者之宅無敢或壞慶曆四年三月二十二
日記

許處士墓表

處士許君諱懷宗字德祖有長子曰程爲潯州司戶
叅軍次日續祕書省著作佐郎某嘗與著作君學同
舍觀稹之爲人年最少而恭謹有法度逮過其家拜

處士爲丈人行聽其言懇懇誘人於令善而考之鄉黨稱處士默治其心居城市接應鞠然視公府門若坑塹不敢投足力衣食未嘗欺人以入一錢不校有無資其子以從學然後知稹之行已者抑有所授也及程稹繼登進士第調官得食而處士亡矣生二子自立其所知而材薦之者皆當世名公卿每知其子者必曰其父母爲誰耶則處士不待書功行列姓名蓋已見之其子也雖然處士名氏不著以聞于後其子之孝心不能自安也皇祐四年秋二子來京師謂

某官在太史宜與世人別族系而銘行實又久知吾先君願文之以表墓域之側處士興化軍仙遊人年五十三卒於天聖八年三月十四日其葬在縣之潘衝原娶楊氏有賢行常從子稹祿養益自清儉如其子之未仕也後處士十五年終年六十五男三人其季曰稹女三人嫁爲里人妻曾祖諱祐祖諱潤父諱術皆以善訓傳其家者凡史氏所書喜家世與功伐以其能侈健其文詞處士世微而中脩故所以文之者約也約也者所以重之而必信者也八月十二日

右正言直史館同修起居注判三司度支勾院蔡某撰

尚書屯田員外郎贈光祿卿劉公墓碣

公諱若虛字叔陽姓劉氏漢之衰楚元王子孫不去彭城歷魏晉以來彭城劉猶爲著姓至唐司徒晏以雄材精智用轉流輕重之術於乾元上元之間飽國饑者二十年至宰相功名益顯晏兄暹爲汾州刺史治有聲稱生大理評事談經評事生左常侍濛常侍生吏部郎中埴自司徒至吏部四世或居長安或在

汾晉吏部生伎實公之曾祖考也爲鄂州節度判官湖南節據其地自王兵四起乃以其孥循江入閩居泉州卒葬南安縣始爲閩人鄂州生文濟是爲祖考徙家福州閩王王審知以其女妻之卒官吏部郎中生皇考府君諱甫閩亡仕錢吳越王法自取所部以爲俸府君不入一錢逮王歸京師而其官屬大小皆得仕府君以母老辭不就祿至今鄉閭稱其孝庶娶李氏生子九人公其次子也公嚴明有大畧始學見鈔錄集書如白氏六帖類卽麾去曰要當以法禁去

之耳通五經大要適其旨義以爲脩身治官之用不
苟爲利祿學也咸平五年登進士第授大理評事知
溫州永嘉縣還上所爲文章真宗皇帝尚儒每親程
自言者召中書試就遷寺丞知隰州溫泉縣移通判
保定軍再遷太常博士通判洪州太姓胡氏子殺人
以厚貲雇老貧者代死舉郡爲之覆藏獄且成公曰
被殺者年少壯強今囚瘖老豈能制其命躬劾之果
老貧者自賣以資其家於是捕棄胡氏子市出受錢
代死者郡中驚伏瀕江民以漁爲生而土豪常半取

之曰江食我田汝漁當吾田所也公按視奏除沒江
田租縱民漁改尚書屯田員外郎知邵武軍其俗鬼
而不醫平居殺牛聚酒侮欺善良喜鬪擊以氣力加
人而得罪戮意愜不恨公至徹淫祠禁巫覡教病者
藥朋醉群鬪賊竊恃強寘于淡法又治孔子廟收學
者爲之開說孝弟之行尊獎賢節吏民刷故所爲而
聽公之所以爲俗習大變年五十終于官天禧三年
二月二十三日也其年九月八日辛酉葬福州懷安
縣越城里公以恩受其父之太子洗馬致仕祖母馮

翊縣太君母潘源縣君夫人新鄭縣君贈工部侍郎
潘吉甫之女謹淑有禮嬪于大家承上以順睦衆以
和終三十年人未始聞其笑罵聲閨門之內肅然也
及公卒愈自約以奉時祀勅諸子學遂以有成爲婦
爲母皆有稱問男四人長曰弁不邇勢利負奇自隱
曰奕有大材智曰昇以文學知名皆終尚書屯田員
外郎曰戒未仕女適進士林孝伯某初與奕昇爲同
年進士奕嘗謂予言丁謂爲宰相私天下士必歸我
乃得進聞公聲名欲屈一見卽推進之公不肯往於

是始知公之所以立身也慶曆中余知福州州人言
公事親親有疾輒不食酒肉居親側雖大暑中夕必
嚴衣冠長幼內外皆有法度鄉人効之又知公之所
以爲家也後爲轉運使至邵武邵武稱公廉平市人
持物入解舍以就善價屬官莫敢侵牟治事快於決
疑靜於臨劇初若不更意慮及施下皆當理要守法
不貸而民不敢怨又知公之所以爲政也是三者皆
世人之所難者故悉書以爲法公以二子爲郎累贈
光祿卿銘曰

劉自漢文史載陳唐有管蕭晏其人厥材絕特持國
鈞晏兄而下八世孫光嚴明允惠在民蟠于郡治屈
所伸種施必獲後嗣振孰從考信唯隧文

尚書屯田員外郎通州潤州劉君墓碣

君諱奕字蒙伯其先漢唐以來世有顯人至祖考皆
仕國朝考諱若虛尚書屯田員外郎贈光祿卿光祿
之碑其嘗銘之系次詳焉君天聖八年進士及第授
惠州推官疾不果行次調南康軍判官移知洪州武
寧縣事改大理寺丞累遷尚書屯田員外郎官歷知

鄭之榮陽鳳翔府判官通判漳州潤州事以皇祐三
年五月二十三日終潤州年五十三明年正月二十
四日葬福州懷安縣靈山鄉越城里夫人陳氏封寶
應縣君子康夫寧夫岐夫女長適韓昌國次明州慈
溪令陳章其季進士林回君於文章要以道理爲得
不苟聲律其論性情推明孔子之法尤非浮屠所傳
力教於人開曉其路從之學者咸以吾道自處久之
貧無以生就舉進士中乙科喜曰吾不能爲時之文
章恐不復得仕進今幸中第吾志得矣其武寧民喜

惟多矣。爲令者多嚴法以止之。猶不能勝。君雖細
事爲之。盡心有兄弟訟者。磨之親愛之理。以感動之。
輒涕泣自咎。引去刑省。而民格慶曆中。元昊叛陝西。
用兵。韓丞相爲經畧使。辟君鳳翔。一道兵民劇事多。
倚君辨集。連年兵敗。民窮。乃上書朝廷。言其兵所以
敗。民所以窮之狀。其畧曰。陝西之要。練兵運糧。最爲
首務。其策皆未爲得。都部署者。上將軍之任也。而無
專制之權。其偏裨才否。不敢輒去。留之軍。無行陣之
法。見利輕進。畏敵遽退。所以每戰必敗。偏裨不效。上

將之令。士卒不知什伍之制。其理豈有勝哉。邊戍益
多。廩粟益廣。轉運使職其事也。今之轉運使。皆以序
進。不計其能。未更年歲。屢遷易之。文書凡日。曾未能
知其暇。以民爲意乎。一方之患。內靡度支。外輟兩川
之賦。調及天下。關陝之民。流離窮困。而邊儲日窘。不
幸天下之患有大於此。何以支乎。蓋由轉運使不擇
其材。不久其任。無所歸責也。又言被邊宜募士人。給
其閒田。使之自衛其境。可以省費。言數十條。率多此
類。事格不報。漳州漳浦有虔州民四百人。入縣買官

所賣鹽令捕之民因闕拒遂鞠其私販而強其法
應成囚多繫久疫瘁相屬君爲喜其非私販而出其
不鬪拒者坐法數十人而已君初仕願天下事若無
所爲而可辨歷官二十年所至施爲謀議多不能如
其意然後知不可以力爲也於是補吏南歸展省墳
域緬然有退耕之志而未果也其終之歲予適寓潤
君病漬以手書謂予曰吾止於此矣惟穉子遲記旣
終歛無新衣橐無餘資郡使民集錢二百千以贖夫
人辭焉歸葬於閩居無室廬產無田園勤勞其家清

節不渝夫人之力焉嗚呼十年之間康夫以學行自
立而能請文永其先烈予旣悲之而又慶其有後也

銘曰

文弊於詞在天聖初牽拘媿偶華調剽膚君於斯文
本末扶踈世言情性淪于浮屠君爲中庸聖哲之樞
經營萬務於時有需旣官於陝晝思夕圖條兵轉餉
實究民痛上書于朝事願之殊漳有寃獄十百其徒
辦處平治脫釋不辜最後丹陽聲聞益敷齋終克明
歸宅海隅父子兄弟次序不踰旣順以安斯其已乎

宋蔡忠惠文集卷之三十三終

宋蔡忠惠文集卷之三十四

明後學吳興蔡善繼伯達甫校

墓誌銘

尚書屯田員外郎林君墓誌銘

君諱冀字希聖潮州海陽人也曾祖珍祖知藝皆以厚行爲鄉人所慕父洪裔贈殿中丞少喜學問手鈔經史傳記數千萬言日講諷自休以是終其身母夫人許氏封潁州縣太君君旣勝寇得所藏舊書益刻厲考治以爲詞大中祥符八年一舉中進士第歷辰

惠二州從事以判入高等廼授大理丞又遷殿中丞
太常博士入尚書省爲屯田員外郎歷知歙州績溪
及歙二縣治有善迹移同判桂州以母老還官事歸
養不得請改知梅州被喪去職及還朝復官通判杭
州寶元元年三司度支副使段公少連薦君監京師
征筭二年十一月戊子疾發且殆其子從先取股肉
雜糜飧以進食疾少瘳卒以其月庚子終于官所年
五十四康定二年十一月初八日卽葬于大墓之域
夫人黃氏封萬年縣君持躬有法式處大族上下無

異言子男從先從思從可皆孝謹力學女三人長適
進士盧幾次適邵武縣尉阮邈其季始筭孫六人皆
幼君讀書不以博記廣聞爲志務躬行其所知者平
居與衆言開陳理要或持異論亦未嘗力辨以屈之
及蒞官當事前有事勢可壓以奪人者君自守益固
其直而後已辰州時五溪夷獠嘯聚攻剽城中益
兵以守君從所分卒往來督運糧餉每先期至事平
詔褒之歙州舊常第民貲產歲歛錢三千萬備僦舟
人挽浙江鹽鬻以牟利久之民愈病或冗散旁郡轉

運使以利病聞仍表君爲歙縣兼總運鹽事君至更
請募人爲卒度材爲舟歲漕益多而歙不逮下流者
還集其服勞革弊舉是餘可知也初君卒將作監丞
黃君城以書至洛謂某曰林氏諸孤哀不能言將扶
持全柩背淮絕江山出吳閩數千里還故鄉以塋幸
而得子之文以銘其先烈不亦慰諸幽乎某明道中
從官漳州始遇君郡下君以某爲志於古者作詩稱
譽嗚呼今以是銘君墓辭曰

求而勿懈者享則旣豐委而不與者異迺弗克

延厥後兮紹德收功列文幽堂兮以訊無窮

葛君墓誌銘

君諱宏字文淵先世居廣陵唐末廣陵兵起舉族渡
江而南至江陰遂畱家焉曾大父諱彪以耆德聞于
鄉邦大父諱詳少嘗負知能謂於時無所用不若施
于吾家以自効乃力於田數十年累致巨資益散施
以廣名稱父惟明一舉進士不中退而購書數百千
卷戒子孫業之君始稚已能去紛侈從鄉黨之學旣
長記誦通博由鄉舉至京師視等輩之賢已者咸盡

誠禮屏所挾焉而下之故與游多聞世之士意氣豪
舉文章亦甚壯健不能工偶配皂白剪磨細碎以是
五試春官輒蠲罷晚乃寄隱於酒觀少年新學躡其
後跳取貴盛一以命決不挂于中然以已之所學稽
本於古人揣稱當世之務甚悉苟汨焉無聞孰與發
而在人慶曆元年秋詔選進士君時已沾疾猶強力
持筆研屬文辭以求貢比歸益疾殆九月四日終于
家享年五十有二以某日塋于青陽鄉母夫人承氏
與君之父皆年七十餘而哭其冢子哀甚夫人耿氏
躬率禮德以宜其家子舅鈞鑄鏗皆嚮學啟謹將大
其世二女長適進士陳賢又其季尚幼君於某爲婚
兄弟故求知君之深而宜銘其壙者某不得辭銘曰
悲乎文淵學足以辨興亡之端而文足以通義理
之要卒不克施其命矣夫

葛處士夫人墓誌銘

夫人姓承氏世爲江陰人居其家以孝謹稱父諱懷
與擇其里中人以行聞者而歸之遂嫁爲處士葛君
惟明之妻當夫人之歸葛氏方爲大姓族屬親疎姑

姊妹姒節時往來佩簪纓珥序列慶賀者甚衆夫人處其間自少至壯且老卒無與忤孝婦於尊章恭畏自力姑于其婦益慰愛之故其生雖親者不敢少慢而歿也雖疎者哭之亦盡其哀享年七十有六其終于慶曆二年八月五日以十月二十日葬於青陽鄉修德里之原下生子八人男五人宏求皆舉進士不中第卒定向勤養不懈宜上書論邊兵利害得本軍司仕叅軍孫六人鈞最爲長既有子矣女三人長適屯田員外郎凌景陽封丹陽縣君次適進士陳玉皆先夫人而亡季女之婿著作佐郎館閣校勘蔡某爲誌其所葬而又銘之曰

夫人於家淑孝則聞旣歸而宐法度是勤有子入官女爲士妻冢婦持孫福祉實多三月而葬中禮之常考卜旣吉冥文以藏

贈殿中丞陳府君墓誌銘

府君之先曾祖諱沆本魏人仕後唐因官江東爲錢吳越王僞署朝散郎知明州鄞縣卒葬四明山下子孫始爲吳人王父諱鏜聲名出吳中錢氏欲以補闕

官起之不可皇考諱處瑩博學於周易楊雄太玄尤推悉其要錢氏數以禮屈致冀得爲用亦避不顧及錢氏以地歸本朝遂徙居京師府君旣長矣傳解經術尤工楷法得善書多手鈔之嘗夢人有授其著者因專意治易其得要妙皆誠心潛通不取舊書師說貴游大人或卽其居而訊禍福府君曰吾老於易於是求聖人心焉又以其數度天地萬物消長及天下之所以興廢人之窮通不足引吾術以証愈閉距不言日與諸子孝經傳疑說雍然自娛垂四十年以大

中祥符四年八月十四日終年六十四男三人長曰見素終尚書屯田員外郎曰太素字仲華秘書丞審刑詳議官曰元素舉進士女二人長適進士盧冲次適殿中丞潘軫府君諱光現字晦之以子登朝累贈殿中丞娶吳興范氏追封本縣太君以慶曆二年十一月二十七日葬河南緱氏縣唐興鄉蔣里以吳興太君祔焉仲華於某同年中進士第先葬以其世家來請銘刻銘之言名也列其先德以及自名府君之德著而嗣子繼以仕進仲華涖官廉平以材能稱於

時將大其後銘曰

世以善修而賤貧者或驗於天若府君究易之本
行潔而堅其享之厚孰與夫空富且貴者耶

尚書主客郎中王君墓誌銘

君諱惟正字晦蒙太原人曾王父諱襲王父諱劇贈
大理評事皇考諱恩累贈尚書工部侍郎皇妣范氏
追封昌樂縣太君胡氏封永安縣太君王氏之居太
原者爲大姓自君之先數世無顯者君始舉明經咸
平元年中第選注瀛州司戶參軍會契丹鈔邊河北

用兵擇能吏督芻糧君兼魏鎮定三州皆以期辨轉
運司以狀聞於朝授光化軍判官兼通判用保薦者
改光祿寺丞東封西祀恩再遷大理寺丞贊善大夫
又遷殿中丞國子博士賜緋衣銀魚入尚書省爲虞
部金部司勳三員外主客郎中初知懷安之金水通
判耀州事州將尤濤與君論事不相能條君十八事
不如法者以聞詔辨之逮獄具而濤悉以誣伏人益
稱君廉能移知絳州歲饑民流輒發常平倉粟賑之
時權臣有不喜吏在州下風君去之且得善官不肯

應其後當丞殿中抑久不報君力辨乃遷被工部喪
罷歸服除歷知遼雅衛德四州雅州之俗右鬼神而
巫覡憑依禍福勒民財以自利君按祠廟之不在祀
典者投其像於江撤屋材以補官舍巫覡爲之易業
龍圖閣直學士劉公燁表君廉平可監刺列郡授荆
湖南路提點刑獄升廣南西路轉運使時安南西道
節度使南平王李蘊薨二子與其叔爭立叛掠宜欽
邕三司敗戍兵殺寨主勢以益振朝廷委君與曹克
明圖之君訓兵走粟爲守禦策作木龍斷欽廉海路

賊不得進君度其內爭必一而止勒兵待之踰年一
子果殺其弟叔自立遣使稱藩交趾平君應例遷回
讓贈王父一官卽評事君也居嶺外聞祖母病請解
使職幸得便郡以就養遂知解州道京師圖上交趾
事宜賜三品服至郡十餘日徙晉州未幾爲江東路
轉運使丁永安太君憂還克三司戶部判官言錢穀
利病之所施行潞州於河東號爲繁會君得之勵精
爲治屢辨冤獄入判三司憑由司出領亳州密州最
後再爲絳州慶曆二年七月二十日終于解壽年七

十一以四年九月二十日葬于某所夫人韓氏封萬年縣君嬪配之宜治家教子悉有法度子五人長曰敏中試秘書省校書郎次曰建中試大理評事監楚州鹽倉曰執中未仕而亡曰柔中遼州遼山尉皆以蔭補官謹而好學爲吏得其家法女適殿中丞長路開次適潁川陳晟次適右侍禁陳宗望孫三人君喜書史老益不懈尤通緯象卜筮之說持已以儉奉官以法仕五十年而無吏過將葬諸孤謀曰古人之傳於如今者託於文也况郎官於今應刻石以載功德不刻不傳其惟孝思建中哀敘其世系官次治迹走求文於余爲之銘曰

吏治之興功利修科條奮奇斷而不顧者斯可謂之材矣然不移勢要根人以資已唯是令善必昌厥後

右千牛衛大將軍致仕陳公墓誌銘

公諱顥文字輔臣其先世臨淮人曰珂者因官入閩居泉州仙遊兵阻道絕乃畱不還公之曾王父曰太子太傅諱口王父曰太子太師諱隲皇考曰贈中書

令謚曰忠順累封南康郡王諱洪進皇妣曰鄧國太夫人林氏曰河南縣太君林氏者以公追封公之配曰太原縣君故永清軍節度使贈中書令王公守斌之女公之舅八人長曰西頭供奉官宗顏次曰三班奉職宗晦宗魯其幼而夭者曰宗回宗旦皆奉職曰宗周借職曰宗可宗傑皆未仕女十人長適皇屬右屯衛大將軍宗昇三人尚幼六人蚤世一爲內殿崇班閤門祇候馬崇懿之妻公之庶官自南康王上漳泉土地之圖除武寧軍節度使授公徐州衙內都指

揮使王薨補西頭供奉官七遷至供備庫使真宗皇帝祀汾陰恩恤勳德之後以公爲閤門祇候公之庶任監筦之局六秦州長道鹽酒稅護民渠文思院致遠務芻秣之司泗齊之職兵馬都監之命四興元府舒廣二州許州之長葛一爲泗洲巡檢再爲明越及虔吉郡都巡檢使慶曆二年以右千牛衛大將軍致仕明年二月癸卯終于建初坊之第春秋六十九以其年十二月丙辰塋於開封府祥符縣魏陵鄉吳子原從先王之域公之世家功業列于太史氏銘于大

墓宜不復紀然某少時居鄉里聞長老爲某言王本
未自王氏世有全閩其後部將黃紹顛據泉州以守
王與畱從効誅紹顛有功及從効爲帥王爲之副從
効歿張漢思繼之漢思昏不治王自代之太祖皇帝
御天下間道請命於朝卽授平海軍節度使太平興
國三年以其族歸京師獻所有地朝廷不加一鏃而
籍二州之人二州之人耕於山漁於澤不罹禍患涵
濡太平之澤者王之庇祐民莫如此深矣及其游宦
知公之爲人處豐貴顯榮之間而能脫奢豪之習清

約恬默以自娛適招延士人講論書史仕宦四十年
率以次遷未嘗吐一語以干勢要人臨官處事一以
法令不能輒爲輕重將老卽引去截然有自止不屈
之意終始善良公之沒嗣子宗顏復以孝聞本朝之
制隸武職者不爲居父母憂去官宗顏力求解罷服
喪以盡子道朝廷從而獎之以率勵天下又能教其
弟宗晦宗魯從學謹飭信乎能蹈孝友之節者也供
奉君謂予曰嗟吾母氏以禮法持守門戶鞠養諸子
慈孝均一自先君子棄世時發篋視諸生平告勅撫

而泣且戒曰已矣乎不復見也孰能永乃翁之傳者耶敢以哀請幸次先君子之行誌於墓某於陳氏所聞所見通知其三世遂銘之曰

推公之父舉二州之地歸命於朝世名以忠推公之子善天下之善服喪于家人謂之孝公乎上承乎忠而下遺其孝公之令德於是而顯十世之宥或以無有云誰必之視公之後

尚書司封員外郎曹公墓誌銘

公諱修睦字某建安郡人爲學通博性介廉喜自修

立大中祥符五年登進士第調撫州軍事推官南雄州判官改大理寺丞知邵武軍之邵武縣遷殿中丞知鬱林州聞母太夫人疾委州印於其佐北走歸道未至被喪哀瘠過禮服除以太常博士通判越州再遷尚書屯田都官二員外通判泉州知邵武軍民有兄弟訟田者公爲陳兄兄弟第之義民棄讓不爭代還前丞相社公時爲御史中丞薦公材能拜御史踰年改司封出知壽州又移泉州瀕海有渠道迎潮波溉漫膏田數十里自渠水湮塞田蕪租逋公與疏渠

流人還業尋坐舉者奪司封去官歲餘通判信州知
吉州公皆不行泰然有歸止意上書願休官政以都
官負外郎分司南京既而嘆曰不事事而受祿不可
謂廉復申前自列于上乃得請久之丞相章公言公
還靜可啟薄者詔還所奪官居數年聲聞益達朝廷
以紫衣金魚就第褒之用聳動天下士大夫視聽以
重進爲高慶曆六年春疾作次所爲文詞四百餘篇
勒分三卷疾益瀆戒其子薄塋若世所嚮浮屠法輸
錢擊鐘與計七日而去齋者皆不得用二月乙卯終

于家年六十八月庚申塋建安縣萬石村公之曾王
父諱某王父諱某皆潛德延休勉于後人皇考諱某
累贈諫議大夫皇妣某氏贈某縣太君公之配朱氏
封長安縣君治家有法卒壽州男覲建安主簿女四
人長適南劍州順昌令丘與齡次適進士丘規次適
太廟室長陳沂次適常州司理參軍何辟男孫二人
曰顯太廟齋郎曰某尚幼公兄第二人長諱某舉進
士蚤亡次贈諫議大夫諱某與公未仕時同名右鄉
國號爲二曹及諫議居朝剛直好言明道中以刑部

負外郎爲御史知雜事論請復辟觸章憲明肅太后怒左遷興化軍終貶所其後天子追悼前忠特以諫議大夫表之公年五十有四卽引身退第舍園池疏列泉石置冊書碁琴於其中意之所適則娛味終日賓親過從或道時事輒謝曰吾方與紙上聖賢語差樂勿溷吾聽以是兄弟皆有終譽公之在官不以法令繩馭下吏刻已率之而吏益畏不以威刑讐憚下民平心治之而民益信嗚呼終始之節可謂善矣將葬其孤覲哭泣以書來乞銘銘可辭乎銘曰

重勢營利衆所趨也耄昏苟前世所愉也中年能休矯妄愚也惟公之存勵夸浮也西人之法志古無也今民涵濡費產輸也遺戒勿用遵禮儒也惟公之沒祛怪誣也

尚書都官負外郎致仕葉府君墓誌銘

葉氏之先居丹陽在唐梁之際有官于泉州者屬兵戈起因畱官下子孫遂爲今興化軍仙遊人時方否鬲連世晦遯不克進府君諱賓字虞卿生當天下文治

乃始業詞學應進士貢景德二年中第注潮州海陽

王簿再調連州桂陽令廣州節度推官商人陳從吉
鬻銅錢捕繫吏治急自誣已鑄鑄法應棄市府君領
案狀不署曰是物非巧工不能爲從吉商也且鑄必
有范鎔具今無請更核果得真盜鑄者從吉坐買賣
得不死一府稱服繇是有能名尋補建州節度掌書
記以保任材廉改太子中允累遷太常丞博士尚書
屯田都官二曹員外郎歷知泉州永春南安印之臨
印三縣事永春民有先惡嫌者冒重辟府君曰吾仇
也獄雖真人亦乘以訾我裁附輕比南安盜截牛舌

其主以聞府君陽爲叱去陰令屠之卽有告其自殺
牛者府君謂告者曰截牛舌盜汝也訊之伏其罪代
歸除通判南劍州事劍當閩衝水行持販茶鹽禁物
上下山出銅銀冶場凡三十餘所聚四方游黠輕剽
劫擊殺黨與牽連事日下吏懼滯繫被罪率不暇精
覈府君專意詰決民得盡其情而獄無畱焉還朝以
年七十致官事家居九年慶曆五年正月九日終壽
七十九明年七月四日葬歸德鄉長安里王父諱擅
皇考諱素能以儒書訓子致遂大其門累贈太常少

卿皇妣陳氏追封潁川縣太君夫人陳氏河南縣君
厚淑恭謹動有婦則前府君卒男二人曰任泉州司
戶叅軍所臨職既去人輒思之曰傳登進士第終泉
州晉江尉女五人適郭尹黃佐郭日休郭憲皆進士
其季之壻泉州節度推官方慎德府君爲政能察明
善僞與吏情隱苟有蔽謾必立見然正其事則已不
淡嫉而窮治之故所至吏民憚其明而不怨躬自儉
約計奉以衣食靡官久無銖錙過累既老閑居勗諸
孫就學時行田隴視農事載酒肴與旁隣阡巷耆舊
往來道說前事以爲樂晚年資用饒足嘆曰吾其爲
利乎於是籍親戚富貧親疎者第而散之人益知府
君官有餘財而約不以資也葬之明年司戶君以書
并次其先君世族功治卒葬月日因其子壻漳州龍
溪尉許稹以來乞銘於太史氏蔡某某既以先達輩
行視府君又與其子游遂爲之序且銘曰

葉先丹陽官遷于閩室久而通翰飛以振初盤邑
治爰佐南海直民寃以聲聞彌大千泉之治決斷
大明一語得盜脫仇附輕劍交衢途猥集剽游事

叢獄夥乃恤乃孚還官卧家協比里閭宴處遨遊
歲月是逾老而中禮仕祿之儀儉則克終德厚之
基年豈不多茲實其歸載行於詞永世之詒

宋蔡忠惠文集卷之三十四終

宋蔡忠惠文集卷之三十五

明後學吳興蔡善繼伯達甫校

墓誌銘

蘇才翁墓誌銘

蘇才翁諱舜元其先自漢典屬國武葬武功其後周
邳公隋房公唐許公文憲四相世居不遷文憲之後
曰傳素避廣明亂西入蜀其子振仕蜀爲梓州桐山
令生劔州司馬寓司馬生贈刑部侍郎諱協是爲曾
祖考其配薛氏追封河東郡太夫人刑部生祖考贈

太師尚書令兼中書令諱易簡終禮部侍郎祖妣崔氏廣平郡太夫人禮部生皇考贈工部侍郎諱耆終尚書工部郎中直史館娶王氏金城縣太君太尉文正公之女生三子皆有才名而才翁最長七歲能爲歌詩文正公愛且奇之奏授同學究出身調蔡州興平主簿移尉越之新昌時詔復唐十一科而新令門選者不得與焉君乞還所有官以應詔不得報乃上所著文章召學士院試賜進士出身明道中主開封之扶溝簿畿內饑甚君欲發廩以賑之其令畏縮輒移病君卽出粟以活饑者用舉任者改大理寺丞服工部喪外除知開封咸平縣咸平聚兵以萬計軍中旦閱卒有馱大校之虐已者方持弓矢輒怒罵衆軍牽連一營驚譁君聞之至其所衆惶泣且訴君慰勞罷之因飲射至暮明日易其軍校而流其唱爲驚譁者遷殿中丞移知眉州眉山會西夏元昊寇延安君條禦賊方畧知府事吳公遵路薦其才除通□□州事賊酋李興歸命邊州繫之而上其事踰時□□下君因言其賊來者宜厚其資速寵借以驅□其未

至者李興輩反爲囚虜必已自悔且元昊慘毒而其
偏校雖畏之其心豈易服從哉若餌以購賞必相引
而至并陳攻守利害十二事以聞以太夫人憂去守
尋勾當京東排岸司改太常博士三司使王公任君
三司勾當公事出爲荆南路提點刑獄未行易福建
路汀州民王審殿王先至歿以賊蓋覆得不敗且三
年矣君至卽捕按尚書屯田員外郎王稷爲部將治
窮其事發王先歿驗其傷猶然以歲久爲請君特奏
殺之又遷尚書祠部員外郎移京西未幾又移河東

以第舜欽謫歿湖州求江吳一郡得楊州未至改兩
浙凡四皆爲提點刑獄君益謹職顏杲卿真卿之後
流寓溫州君索其祖告身家牒推之得其實建言近
年守臣因賊屈附抵法誅戮蓋忠義不修莫爲之勸
今二顏之裔曰惟孜似賢皆爲編戶民若錄其嗣顯
白二顏事以動天下可不刑而化朝廷特官顏氏二
子祀明堂恩度支除京西轉運使邕州峒獠鈔二廣
邊用不給君以所部羨錢二十萬緡助之克三司度
支判官至和元年五月初二日終于京師之祖第年

四十九夫人劉氏旌德縣君賢而有法男曰洎大理
寺丞曰澥注洞皆太廟齋郎鴻汝及二女皆幼君曾
祖而下塋開封府開封縣宰輔鄉才翁之歿汗無資
產以爲生諸孤就養江南居潤州侍柩以行某年某
月某日葬於丹陽某鄉使人請銘某與才翁兄弟遊
最久今皆已亡矣尚恐銘哉初才翁少年欲以文詞
進願還官就科試思與天下英豪角逐於筆研間以
力決勝不得如其意逮邊隅兵興夙夜講畫謀策要
以術數剪屈夷虜書屢上不見省用大臣如前丞相

賈公丞相文公故叅知政事范公皆持國秉力推薦
之終以序進志不得騁平居談辯唐數百年間喜稱
魏鄭公諫諍裴晉公德業李臨淮將兵衛公處邊事
劉忠州通流財利韓退之文章類此數人而已其議
當世人物亦以之爲標的於人少所稱許至有同班
列偕出入漫不省記以是與者益少然蒞官當事定
慮果決所至制束強黠敵尚風儀其爲文不迹故陳
自爲高古雖所不與者亦不能掩也尤善草隸藏書
數千卷皆手自讐校撰述奏御集十卷塞垣近事二

卷奏議三卷文集十卷課子舍治經史率有準程所以諸子皆積學有立銘曰

龍淵之器不投兕犀孰知其利志古豪英不任於權孰知其智負才自高不屈於人與世或異先民之載德不必年賢不必位大江之南順天之吉慶

延嗣世

瑞昌縣君孫氏墓誌銘

夫人之父故禮部郎中直史館諱冕在祥符間能直言有聲名數更劇郡治用嚴明當世推重夫人少喪

母鞠養艱勤及既笄禮部自負才稱又加怜幼女孤苦必擇奇士得今尚書職方郎中葛君公雅遂以女歸葛氏初夫人之行公雅年餘二十以文詞中甲科爲州將幕官指期可得貴仕久之回旋銓筭僅工紀平居邑邑益不自得或復慨嘆夫人曰爲官窮通豈不有命耶既而公雅升郎位再以郊祀恩封夫人樂安瑞昌二縣君至和二年公雅罷南劍州夫人從還京師道病發亟命旋歸以三月二十日終於正寢年六十七月二十九日葬江陰軍江陰縣化龍鄉耐於

先營有子蒙登進士第處州縉雲尉女一人未嫁孫
六人日逢郊社齋郎日克日三老女幼夫人守禮法
動止有度舉族姻內外無有不得其所持生簡約使
公雅能專意公家而無錙毫擾於民有內輔焉喜誦
浮圖書終將遺戒薄葬祭之具神情如平生無有悲
怛蓋婦人之難能者銘曰

叢簡之芳一香同色生于名家化洽禮則歸助其
夫約清厥德唯壽不忘壽今有極新阡崇崇子孫
孝思寘文幽堂茲後之儀

延安郡王李氏墓誌銘

延安郡王李氏太宗皇帝之外孫真宗皇帝之甥齊
國獻穆大長公主之女也父爲鎮國軍節度使駙馬
都尉贈太師中書令尚書令許國公謚和文諱遵最
大父運州刺史贈太師諱繼昌曾大父樞密使鎮國
軍節度使贈太師中書令尚書令隴西郡王謚元靖
諱崇矩家世勳業列在國史大中祥符三年十一月
主生於永寧第彌月獻穆公主見主於帝所帝曰女
吾之所出也且有奇法異時非才賢不以速匹因出

縑帛以爲慶逮周晬召至內省臨視除髮以珍寶戲物百餘種賚之甫七歲卽賜冠帔入謝賜見皇太子將拜之帝曰齒同矣孰爲長徐推王生日日後皇太子乃使拜蓋欲以長幼序之每讌會中常呼置旁坐所以恩愛之良厚非諸王公主女所可擬天聖五年封長壽縣主以歸今閤門使忠州防禦使錢君晦錢氏自忠懿王舉所承襲十有三州之籍上于朝廷而其人民數十百萬不罹兵革之役以至太平陰施深長勲美益世王家以是通婚姻及主歸而其君舅文

僖公以代誥命叅禁密遂持將相印其族植筭而通省戶者以百數門闌廝役青紫群列號爲貴顯然以主之重務自損下主益恭謹持禮承舅姑奉祭祀夙暮不少懈姻親姊妹降屈色詞以相接親疎有意於是諸錢內外悉稱主賢明道二年進延安郡封自和文公薨主歎曰吾獨有母存乎孝憂愈至時物之新者必先獻乃敢用皇祐三年獻穆拍世主哀戚甚却珠金之餘日夜涕泣思慕因見癯悴上念先皇帝弟兄無復存者乃恤其孤謂主曰大長公主歲常資郡

主厚甚今寂寞耶俸錢每月六萬特增至十萬是年
除夕主還外舍設奠蓋歲新矣而母不復見也號慟
咽絕左右更勸莫能止夜中氣懣胸比歸疾益力戒
二子自強以立門戶歛葬之月必以約四年正月四
日終春秋四十有三上惻悼不視垂拱朝一日命中
司賓臨弔賻贈加等以其年四月十日葬河南府洛
陽縣邙山之原從先姑之兆子三人曰景初光祿寺
丞景裕大理評事其季蚤夭女適右班殿直趙思復
封壽安縣君先主二年而亡孫男四人初女父和文

公博雅有文喜與賢士大夫游戲穆又以賢德輔之
著于天下主更見積習皆善行故不以貴勢富侈自
用閭閻民有凶喪不能給必資其家隸侍使令未嘗
訶譴有嘉賓焉親視烹飪雖其資敏淑然有所從來
矣主善書能爲五七言詩居間設烈女圖讀書史以
自娛二子就學日程其所爲又勤解說曰吾觀持梁
策肥者外雖矜豪而中空無有多慢侮人豈聖人所
謂愛親者不敢惡於人之義乎若不爲此吾意安矣
乃二子知所以爲學防禦君能亢其宗以有聲名主

實訓有助焉銘曰

猗哉延安肖于慈親少所養習既歸有聞婉婉令
善率禮而文唯時貴重世莫與隆群從祁祁車徒
有容天子惟舅言朝于中北第高門爰東其軌父
王之孫母兮帝子曰予爾思我適則喜旋于我家
相應簪笄齊珥則多君姑娣姒以承以比和樂有
序孝愛淡矣哀隕其生子學而力夫以材名胡不
遐考用觀厥成就不願年曷支其傾惟德之壽寔
久益明于何其壽其壽斯銘

尚書職方郎中謝公墓誌銘

君諱某字某泉州晉江人曾祖某祖某父某以信義
稱於鄉太夫人徐氏生三子君爲最少祥符八年舉
進士歷撫州臨□□□軍事推官太守受賕賄舞
法君据平無所撓訟者不之守而之君州政得不敗
守亦善去改大理寺丞知龍溪縣縣人曰是故州從
事持守正使無害有恩於我相與喜具酒食相過從
爲慶賀者至則決滯訟條剗舊蠹民以便安徙容州
北流縣城郭倉廩解舍道梁一皆新之就知雷州軍

州事州傳海有蠻夷風不知學爲葺孔子廟聚諸子弟教以儒術雷人業進士自君始大豪李郁築城得古印立盜契奪民田百餘家五十年不能直有訴於君者卽捕繫庭下問狀具伏而郁老當贖君條其甚惡不可假卒致以法通判福州晝購巨盜悉誅其黨諫議大夫方公謹言治廣州辟君貳政廉取蕃舶輸官之利以招其徠至罷去夷人涕泣思之知建州歲無留獄長老紀焉又知開封府之祥符治愈精微有聲名朝廷用薦者言將任以刑獄錢穀而君懇求便

藩得海州會歲早有蝗過境一昔拱稷歿吏民驚歎以爲異政之應皇祐五年正月十四日卒於官其孤護全樞以歸某年某月某日塋某縣某里娶黃氏故直史館宗旦從妹也再娶其弟封永康縣君子四人彥輔太廟齋郎先卒仲規舉進士第越州蕭山尉叔矩未仕季成太廟齋郎女八人適余昞祝嘏楊璟劉鼎臣黃世永朱仲陳大雅陳箴君性樂易無貴賤親疎接之皆盡其衷故人多喜愛之數官領表不以僻陋自失所至喜設施爲民賴利在海州嘗謂其子曰

謝氏居閩未有仕者吾起家州縣自大理丞入遷爲
尚書職方郎中贈吾父都官郎中母長壽縣太君斯
亦榮矣歷官三十九年無小過失實吾謹畏然爾汝
曹念之故其子益循篤學皆可以大其家者銘曰
六十九爲已壽位郎官才未究政在民斯不朽

內殿承制王君墓誌銘

王君諱翊字輔之兩浙都巡檢使罷還皇祐五年五
月七日卒于京師以其年七月二十四日塋于開封
府開封縣褒親鄉其孤號哭而杖授書使者以來請

銘曰我先君之先錢塘人後遷于汴少孤家窶以書
藝補官歷七任終六十有一今葬有期且走公門下
日久固知其所爲幸或銘諸墓使有聞於後世公之
賜歎矣余爲次其官族初授涇州保定主簿治有稱
再調永州司理叅軍州將曲獄君曰獄辟定法可妄
移哉永邊溪洞蠻獠寇境殺巡檢使君請募敢戰五
百人自率之遮阨設伏餌以羸形賊果來擊之敗走
入焚其廬以理官不應捕寇不當其賞除常州無錫
尉轉運使段少連以材明嚴察部吏每行君縣必載

君舟中語至移日出界乃遣尉滿君歎曰俸微不能
芘吾族還都還居視時物上下取與出納居二年廩
有粟馬所與遊皆貴近人久之陝西用兵討元昊君
奮曰陋矣吾視此屑屑耶上封章言十事書奏卽召
對延和又令於資善堂究陳利病再遣使問所欲爲
曰臣言可用幸天子用之不敢微利夏隨爲陝西招
討使薦君智能授左侍禁涇州長武寨主元昊入寇
至渭州寨民將逃去君諭之曰入保此吾能必守衆
乃止遷西頭供奉官河東麟府路走馬承受公事專

置堡寨一十有五招懷蕃戶二萬餘每進對多言時
政得失輒觸權要再遷爲承制三司使葉公清臣任
君監在京摧貨務僅十月計所贏錢二百萬三司使
移他官君失所知求見上言事願解局遂除都巡檢
使又上書曰臣有通流貨財之術歲可得錢千四百
萬欲道其所以然於上前再三不得召猶曰罷歸幸
得望殿陛咫尺盡吐吾術矣比至京師病且卒卒不
能出其術悲夫君娶胡氏子七人勇曰威三班奉職
曰煒兢舉進士兢中第詰珪皆幼女長適前河中河

東主簿呂公次適謝公弼蚤亡銘曰
材以時成則資材艱於用匪成之艱利國有原動
如轉圜日時與成惟命惟天

右班殿直監磁湖都鐵冶務程君墓誌銘

程君居興國軍大冶縣世爲著姓右班殿直諱叔良
字仲卿尤有善行其曾祖諱侃仕僞唐軍器副使祖
諱滿光政院承旨父諱昭字三班奉職以材智自高
金陵平浮江而上至磁湖依鐵山冶以通吳蜀之利
積數十年致鉅資散施周人急難名譽翕然君承父

兄之舊少從學好老氏書服其慈儉之訓所居夏秋
潦水環民舍衣食無所從得君計其口而食之疾者
餌以藥石死者葬以椁歲用爲常明道中江南饑疫
殍殮狼籍道上詔督郡縣開廩以濟之發徒以瘞之
尚莫能周而君之里間無饑人無露骸其視人之所
苦若出於己晝夜不懈親戚之貧而歸者隨所厚薄
而活之至於資身自爲約薄不營出入悉責家奴時
一省視去其歎已者以是雖居豐有而甚適旁居田
塋治園池植草木發泉石在處爲亭臺賓親遊行嘯

歌一醉洒然當世名公卿作詩以詠道其壽年五十有六以疾終皇祐二年閏十一月六日也將疾自疏簿目一通皆治喪事親族之禮施用之具與其葬所若年月日既終其孤啟而行之無有乏事遂以五年十月二十五日葬於流水里之南岡君兩娶鄭氏有子九人男大年三班奉職治經史力世其家曰龜年堯年康年皆敏飭向學女五人長適大理寺丞郭之美次適開封府太康主簿蔡高次適衛尉寺丞聶平仲二人尚幼太康主簿予亡弟也以婚姻家知君最舊有所部官嘗以書通客與之錢不能塞其欲其人後言財利事得出使南方猶泄前怒增君官課鐵歲百萬指期必破產或諭君出其手迹以直其事君曰寧破吾產勿破吾行予乃知君終長者爲之序且銘也銘曰

致適於無以放其身厥隱于真捐已之有利及於人唯義之儷愛協鄉閭不獨其親允富其隣生也勿累沒焉不氓考信于文

泉州司戶叅軍葉君墓誌銘

葉君任字仲堪興化軍仙遊人父諱賓尚書都官員外郎致仕恩補一子官君以是爲江州德化縣尉歲餘乞便家事親得泉州司戶叅軍時監司有不喜君所爲不苟者因自牒去職歸侍都官府君至歿不去左右遂無意仕進以終其身君於爲吏臨衆必先繩其尤強猾者治民必先矜其尤貧弱者故所至必辨而去則思之上官以勢奪其是如以礫食吾不從也其餘家居廩有餘粟遇歲凶荒薄其直而出州黨賴之民有喪與疾時其急難以濟其力游舊之好益困

愈親若寒而就燠吾不去也故其生也人譽之而亡也哀之迹其所從來蓋有以得之者初棄官歸年方壯強頗窮山水娛詩酒以自放或說君起仕君謂之曰達者人之表而議之招也享其利而不勝其任得所欲而違於義君子不爲也古之人所以約而自全者其心豈異乎人哉蓋知其所以然而安於分也且怵惕窮年孰與茫茫無間以自適乎君生五十四年而終於嘉祐三年十一月三十日葬於歸德鄉化善里其世次予嘗誌都官之墓可從而考也初娶王氏

再娶呂氏皆有賢行而蚤世長子曰祐以文詞為名
進士卒年三十日裕十有五歲持父喪如成人日裕
尚幼女十一人二人適太常博士許禎柳州宜章令
陳啟期六人為進士妻三人未笄許君與予善述其
孤之意從予請銘銘曰

行脩於鄉而老少之懷志安於分而榮悴不遷此
力於吾道者也若夫冥乎造有之端託於適化之
會於我不居乘時以行抑老嚴之徒歟

太常丞管勾河東機宜文字蒲君墓誌銘

蒲君叔範天聖八年自閬州以進士貢至京師年二
十第中乙科余時少君一歲而第同籍居同巷出處
相從意氣相得也皇祐五年君以太常丞管勾河東
安撫使司文書隨其府君并州而余為知制誥權禮
部貢舉有以雄詞壯論異於眾者驗其名氏曰蒲宗
孟其父師道乃君諱也是年春宗孟釋褐予喜君之
有子且將賀宗孟歸亟以書計曰我先子以四月一
日終于官孤宗孟扶喪以寓京兆明年十一月一日
遂葬京兆府咸陽縣龍首鄉之北原敢以告余既弔

之而爲之誌其葬曰君曾祖茂璘仕僞蜀爲彭州判官祖頴士善藏書父伸贈大理評事三以鄉薦退於春官自號北谷散夫君承父詞又得所蓄書以讀而性警悟十餘歲能誦經傳屬詩賦陳漸以文學名於蜀一見君所爲詞章乃以女妻之今延福縣君也太夫人陳氏追封奉先縣太君少失所恃事繼母朱氏封壽昌縣太君禮孝尤至故鄉黨稱其詞行及蒞官處事又以材聞初授成州團練推官吏易君年少不更事君未旬月已通法令簿書擿其隱謾惕惕畏服

再調延州推官元昊慢形見君謂州將郭勸曰度元昊必變變則延爲寇衝城圯塹堙無以爲備願建言治之郭勸以其言聞于朝報不下旣而元昊果叛詔城延州君曰役促民勞未戰而困也范雍以振武節度爲陝西經畧使治延州宦者盧守懃爲兵馬鈐轄中貴人臨邊自喜事必已出掌欲決有所行而雍難之守懃怒發聲色引起君止之復坐曰太尉爲大帥而軍政不一鈐轄驕傲如此何以帥下願太尉斬之以徇衆守懃泣恨日擗其過至罷歸莫能賽所願尋

爲武寧軍節度推官梁洋二州人爭水利數十年競
訟至破產不已朝廷下其訟轉運使遣君按視君從
二州人以行隨所曲直而辨之爲立約束分流溉注
二州之人各當所欲迄今便之以父憂去職服除除
鄆州觀察判官監杭州清酒務改太子中允知京兆
之高陵高陵前號難治君後威刑而先禮教有父兄
告其子弟之不令者君召其子弟語之曰順於父爲
孝順於兄爲悌汝以悍父兄之心遷而爲順則爲善
人夫何難哉我卽坐汝不人類矣聞者愛服遷善縣

豪距縣二十里作府君神祠以巫覡蓄蛇怪日言禍
福簫鼓歌舞通晝夜男女往來輸金繒木石爲之立
廟至有冒爲尚方器服者君與民期曰今將禮府君
神民間令來悉集旣至羣豪翼巫覡以導君曰未齋
絮未宜見神且汝能迎置府君神者及能帥衆力而
廟者巫能通神以下福禍者果誰乎衆各指之君卽
麾縛數十人繩以嚴法籍其財而夷其廟移知泉之
晉江會宣徽使李昭亮知延州奏君改發署判官事
宣徽徙澶州并州皆辟爲從事君感宣徽之知己事

無鉅細力爲畫議君沉靜有識慮壓於貴勢必諍辨
是非平居鮮語人過喜察姦貪結其手則已不務煩
苛善議論上書言禦戎備蜀廣儲嗣事皆切於世者
而官止太常丞年止四十有六自初仕至終皆在幕
府助人爲政而未嘗得專所爲以見於人也旣卒貧
空孤宗子孟紹其家有女七人三嫁爲士人妻四人尚
幼其稱明年至和元年也銘曰

才不必有位而德不必有年或曰命然生有善行
而歿有嗣傳孰與社焉已乎奈何歸安茲阡

終

宋蔡忠惠文集卷之三十六

明後學吳興蔡善繼伯達甫校

墓誌銘

尚書職方員外郎呂公墓誌銘

呂公諱士昌字子弼天聖八年舉進士及第調吉州
永新尉婺州司法叅軍用舉者改大理寺丞監常之
商稅務移知益州靈泉縣以太夫人高年願監舒州
皖口倉未行服喪外除知江之德安罷歸三司使
田公况辟君編三司例策書成二百卷權知功州五

遷爲尚書職方員外郎知潤州以代期未至寓居江陰軍嘉祐五年七月十九日終年六十二七年正月十三日遂葬江陰之江陰縣化龍鄉曾祖諱裕東平壽張人祖諱某贈大理評事父諱延之終湖州節度判官因家真州之楊子縣贈屯田郎中母趙氏贈永寧縣太君繼母孫氏仙遊縣太君娶葛氏封壽昌縣君男三人曰豪許州臨潁尉裘裘皆進士女二人長適楊濰次未笄范文正公薦君館閣之職田公又薦爲提點刑獄皆未及用而卒子弼寬恕渾厚與之言

初若可見其際及游泳益久卽不知其所之視世俗窮通壽夭榮悴憂喜無一事可係其志居間讀書爲文優游終歲其與人處若槩取之從容而論當世士蓋所與者無幾矣嘗得僞造印文者其法應免遠官及移蜀或謂用此可免君曰幸人之死以道移蜀吾不忍爲其所以爲人大率如此此前世所書有德義量度君子不能過也銘曰

內全於德不與世異官無顯功進不近利古有君子其道斯類巖然高風薄夫之媿

贈光祿少卿沈君墓誌銘

府君諱平字遵道曾祖曰籍衢州常山令祖曰德饒越州剡縣丞父曰仁諒海州响山令其先吳人剡縣丞卒葬會稽後响山邊老於和州因而家焉君少與伯兄曰及舉進士爲文章通書史旣而伯兄景德及第以仕而响山致政事還歸君曰吾其養親乎塵陽關田疇因物適變遂以富饒計鄉黨親戚厚而周施之逮親終伯兄服喪乃籍所有以奉之伯兄曰吾利汝財乎於是悉力以治喪事久之族子欲異產與之

利田宅而自取其中下者衆益義之君曰吾有五子教以儒術清白足矣其不富之患乎以天聖二年四月二十二日終是月二十八日葬於龍場岡之原夫人胡氏男五人曰立齊京言克女三人君蚤歿夫人賢而有禮訓育諸孤立以進士中科爲尚書兵部郎中兩浙轉運使迎養三十餘年累贈君光祿少卿敘封夫人壽昌縣太君嘉祐六年夫人卒明年舉祔舊塋兵部博學有文藏書二萬卷又所至稱職將以材能進於時宦仕顯榮其可量哉所以知君識慮之遠

也銘曰

不仕而耕以養其親而終於其身于嗟孝兮力而
豐有施及州里推其族子如其義兮守法儒學教
厲子孫實大其門不亦智兮龍場之下卜吉而藏
勒文前岡孰與壽兮

尹夫人墓誌銘

夫人姓尹氏父尚書職方郎中直昭文館諱少連郎
中有數子而女獨夫人又少聰警識圖書辨音律故
加愛焉及長以歸國子監丞葛君實丞晚得官當未

任與夫人治家事夫人事姑勤謹不懈而於夫人之
族親撫接皆有禮意母楊氏諸子隨官遠方夫人念
母之老迎歸以養年八十餘終於夫人之家卽葬近
暨其於孝愛深矣丞以文進而久不第夫人未嘗戚
戚歲時奉祀與娣姒族親宴飲列女僮鳴管絃以相
和樂觀世之休悴初不經慮益喜浮屠書頗知其指
歸有男令彥汝奇皆舉進士女適真定元氏王簿施
硯其季幼也內外孫八人享年六十以嘉祐六年八
月初九日辛酉八年八月十五日甲申葬江陰軍江陰縣

化龍鄉丞曰吾妻之賢君不可以不誌間千里之遠
以來請銘某銘曰

詩稱公侯首考其家均一之德法度是循唯彼婦
道於斯則難嗚呼夫人茲其尚焉

光祿卿致仕張公墓誌銘

公諱盥之字景山其先黃帝之孫始作弓矢王祀弧
星以官受氏周衰六國爭雄而張氏五世相韓良佐
漢有功侯於畱畱侯之後丞相禹司徒歆子孫益多
散居四方其居東南繼爲大姓曰簡者廣陵人生昇

仕唐爲滁州清流令昇生約金吾衛長史約生訓公
之曾祖也以勇謀事楊行密爲黃州刺史祖諱璆仕
僞唐校書郎後與親兵贈尚書屯田郎中祖妣顏氏
考諱泌右內史學士太祖平金陵從後主歸京師授
贊善大夫在太宗朝建言時務評讞法令多所施用
終給事中累贈太尉妣馬氏贈清河郡太君公少孤
知力學問有名於時大中祥符八年擢進士第授溫
州樂清尉再調潤州觀察推官召還校館閣書遷殿
中丞集賢校理通判常州常饑發運使急於官糴穀

益貴公奏罷糴而民不流亡蔡文忠公薦其材可任
監司之職時輔臣不公悅者出知溫州文忠公又薦
之徙淮南提點刑獄楊崇勳以恩倖橫恣護吏漁民
縣令有不已從者崇勳怒下令獄公往察問而出之
流所護吏數十人崇勳怙怙顧首尾於是部郡相視
以法移廣南東路轉運使廣之夷落有罪任其酋以
夷刑夷刑慘酷公請以律令論海外船舶歲至犀珠
瑋瑁諸香奇物官取十一城中濠與海通惡少年暮
夜乘潮汐苞藏奇貨重物不肯輸官前有欲爲水柵

以制之者卒中毒死事遂寢公治材他所一日移置
濠上水柵立成貨利稍稍入官海有羣盜聲指廣城
民相傳動驚走郡爲備具公料賊來不先聲徹倘張
飲人得以安賊亦果不來代歸權三司度支判官未
幾除戶部踰月出爲京西轉運使且行加直史館改
授河北賜三品服是時契丹頻年遣使道路交衽供
具百名取辦於民邊郡益戍兵調用滋廣公計其所
必用取之澤其所不急去之不以名使人要必功實
雖米鹽下吏莫不延問稱薦禁束侵牟故吏畏而爲

用民以是使之轉工部郎中召還爲三司鹽鐵副使其職文書繁夥公一省不怠條理出入下不敢欺三司使奏他事上見公姓名獨語曰必須再去又首肯之明日除天章閣侍制河北都轉運使入辭上曰卿之行出朕意旣至爾書委以密察邊事軍馬重輕與兵官材否公感激天子所以推信勵力以安百姓實邊塞選兵擇吏爲國久計未幾保州兵叛州兵幾萬人號都巡檢司先嘗從太宗北伐有功敕其軍每出巡別給金粟兵分三部州將領其一裨將領其二其一

後州將典城兵不出巡亦不復給裨將皆中貴人月必出巡出則給之或言其不均者朝廷委公其事卽允以武臣代中貴人總三部之兵更其出入而廩給均焉中貴人罷去悒悒懷恨未有以危公者會監郡與主兵官不相能辱之兵怒殺監郡閉城叛而以公罷其金粟之給爲名公馳至城下迺卽以兵環之朝廷累下敕榜招降而門其東西至堅且懷疑太子少傅田公現侍總其事遣部將郭逵入城曉諭門開諸將入其唱爲亂者千餘人衆恐其爲變公謂田公曰

保界虜壤兵驕叛亂如此反覆未可知今不芟除所謂養虎自遺患也於是悉坑之保州平奪職知虢州居三年貝州軍亂先其所欲危公者謂公前使河北有祇人李教坐法公寬之貝卒得李教爲師以亂冀人段得正將詣登聞自陳常爲李教獄詞逮連教父曇轉以私書屬公同職者得詞絕至澶州監河橋索其藁以聞事下御史府貝之亂實無李教而得正所訟無根猶追三官監鄂州商稅復工部知漢陽軍祀明堂恩遷刑部復待制知湖州又移揚州公自以直

廉遇天子任使欲以所有唯上所用不幸一跌摧落不復自振年且至矣遂上書乞還官職之事徙潤州申請益堅除光祿卿致仕還老常州以嘉祐七年十一月二十九日終年七十八遺命葬滁州清流縣昌城鄉杜浦村從先人之域諸孤以治平元年五月二十六日克葬先夫人任氏後夫人魯氏叅知政事肅簡公宗道之女封□壽郡君男曰次卿試將作監主簿蚤亡曰次山次元並大理評事有材能名女六人長適京西提點刑獄宋任次適廣東路轉運使秘閣

校理蔡杭次秘書郎田沈次著作郎佐蔡天球次新
鄉令石約次大理評事呂希哲公忠廉鯁直以節義
自尚愛友親族甚厚謀於國不以其身之安危篤於
親不以其人之厚薄吏治精明施設若煩密難通而
公持之簡易所至民懷其惠而不觸其令尤於本朝
故事詳悉自建隆以來史所不紀每指一事卽疏其
人姓名年月最爲審據家居或客使造門語及天下
利病慷慨議論憂發顏面忘其身之老也夫士之處
世立一節一行已能自見於後况其多者然必有誌

錄乃可傳信銘曰

礪世之速先於飭身防吏之嚴本乎愛民資國以
富其要曰仁佑武以制其威曰神力志於斯庶用
自伸矯矯在公卒更於人願言返葬社沛之原寘
文坎中名與石存

工部尚書集賢院學士贈刑部尚書諡曰襄余
公墓誌銘

治平元年六月癸亥工部尚書集賢院學士前知廣
州軍州事余公薨于江寧府之行舍以聞天子爲之

不視垂拱朝一日賜賻有加贈刑部尚書謚曰襄其孤奉公明年七月二十七日葬以計來且求誌其壙某爲次哭之已謹序之曰余氏自閩徙於韶之曲江曾大父從大父營父慶累贈大常少卿母黃氏追封吳郡太夫人公諱靖字安道天聖二年中進士第尉虔州之贛縣又中書判拔萃科改將作監丞知洪州新建縣再遷秘書丞入崇文館校三史謬誤景祐三年克集賢校理范文正公知開封府屢言丞相過失貶饒州言事者畏縮不敢論列公節上疏曰古之帝

王逐諫臣終爲盛德之累仲淹宜在朝不宜遠謫坐是落職監筠州稅尹公師魯歐陽公永叔繼之皆以朋黨斥去某官微不得自達作詩四篇以直之一日傳于京師故天下目爲四賢移監泰州稅又徙知英州丁太夫人憂還朝復集賢校理同判太常禮院慶曆三年上念西夏亂邊官軍屢敗四方困於供億議增置諫官四員以補聰明向之觸丞相而得罪者頗引用除公右正言於是朝廷之大議政事之得失權臣材德之是否士大夫之賢不肖莫不盡心而舉

正也元昊爲患日久時議有金縉之賜輒首罪稱藩
將從其請而契丹聚兵燕朔曰我爲南朝皇帝討夏
人勿宥其罪朝廷謂借契丹之兵以討賊則彼自矜
功拒元昊之請絕其向順之路必也却契丹而納元
昊當得使者以成其事公亦屢言二鄙利害乃遣公
使契丹旣至辨其曲直以理奪之比還契丹收兵元
昊稱臣四年知制誥史館修撰其年再使坐習虜語
出知吉州數十年間天下風俗以謹默自守掩覆瑕
垢爲長者一日刺舉彈繩多或罷免又嘗所言者進

持國柄仇人乘勢中以事授將作少監分司南京久
之改光祿少卿天子且欲復用權臣以諸衛將軍壽
州鈐轄處州服父喪儂知高陷邕州循流東下破九
郡次廣州以秘書監起公喪廬知潭州金革之事義
不得辭改知桂州經制廣南東西路賊盜事廣城堅
不下賊大掠西歸所向無前趨邕州欲倚峒穴爲久
居計公先移檄交趾及諸峒使之捍賊智高至外無
助援會朝廷命狄宣徽青將兵至公與孫公元規實
共其事智高敗走復邕州乞解官追終喪制誥不允

除給事中仍治舊府御史梁倩言賞不當功又遷工部侍郎選處士入特磨道士擒智高母與弟送闕下戮之克集賢院學士尋遷戶部自言久官嶺外瘴毒所侵惟陛下哀憐又移潭州青州遷吏部嘉祐五年交趾入邕界殺巡檢五人駙召公於青州上諭之曰卿熟南方事已授卿廣西體量安撫使其勿辭公至邕召交趾用事者費嘉祐詰之曰汝主世爲藩臣何敢爾耶邊民私忿相酬不知官軍誤犯之幸得自新當送首惡者歸命旣而械致五人泣刑于欽州歸奏

所以治蠻之狀授尚書左丞知廣州今天子卽位遷工部尚書廣多奇貨南官者蓄以爲利公戒其北歸勿得持南物其俗輕揚教之禮法簡而不苛去之日百姓懷之公薨年六十五娶林氏贈尚書工部侍郎從周之女封魯郡夫人男三人伯壯殿中丞蚤亡仲荀太常博士叔英大常寺太祝女六人長適尚書屯田員外郎郭師愈次秘書丞孫邵次建州司法叅軍周熊次秘書省校書郎章惇裕二尚幼男孫四人嗣恭嗣昌皆太常寺奉禮部嗣隆嗣徽未仕女孫五人

文集二十卷奏議五卷三史刊誤四十卷公之在館閣居諫院某嘗同職事其斥筠州使北虜經制二廣賊盜平定交趾知廣州皆見其行也故其學術文章忠義謀畫知之最深居常謙畏寡言不敢少忤于人及論事上前分解落落詆刺大臣易于褐夫出入兵戎危難之地若在宴處何其壯哉已之無悶用之有爲斯其蹈夫道者也銘曰

公進于朝卓爾辭藝任之諫諍直言警世西夏亂常寇攘洩歲翻然向內願輸信誓契丹橫議集兵幽薊單車出使安危是繫胡騎引歸羌酋受制風雲指麾天日清霽峒獠猖狂自西而東起于喪廬經制元兇賊竄窮荒生致其母戮之馬市腰領殊處交趾來擾再往南土呼其種豪屈之一語二廣十年恩威是宣公薨民啼其何使然返塋終斯全我銘公墓唯信之傳

司農少卿致仕王君墓誌銘

達夫諱益恭姓王氏其先居太原徙潞州曾祖諱崇贈太師曾祖妣周氏齊國太夫人祖諱景純贈太師

中書令祖妣祁氏魯國太夫人父諱同今上御名樞密使

吏部侍郎同中書門下平章事贈太師中書令兼尚

書令魏國公妣石氏追封永嘉郡太君寇氏華原郡

太君自魏公始家河南今為河南人君于大中祥符

間以蔭補右侍禁天禧三年奏換衛尉寺丞自衛尉

六遷為尚書司封員外郎康定二年以司門致仕皇

祐三年大饗明堂除庫部以大祀恩用子升朝例敘

封改水部又改倉部考功二郎中嘉祐八年上即位

授司農少卿治平二年三月十二日終于西省思順

里第年七十四以其年十一月二十八日葬河南縣

魏封原先公之域娶李氏封金城縣君子二人謹言

尚書駕部郎中謹行殿中丞女三人君所歷官監昭

應宮法從庫開封府襄邑縣稅西京麴院磨勘司簽

書河南河陽府節度判官公事最後知河南縣凡九

任行三十年清修無過必稱其職嘗慕唐王龜之為

人務遠權利魏公之治雍孟襄汝也皆去官侍養逮

叅知政事于洛陽治新第成君致書于魏公陳老耄

止足之戒願引年謝政還居于家輔藥石導和氣以

延壽命言詞懇懇公以詩荅之曰疏家子歎揮金後
禦寇妻悲遺粟回爭似吾兒知止足陶廬容膝早歸
來公以朝廷恩數倚任之大至于將相終□□□□
薨服除君授河南自仲夙志遂還官事日與高隱者
遊晚年喜釋氏篤好華嚴經日繙一帙淡通體用止
觀之趣家所藏書雖子弟求閱必手自檢授出入甚
謹而于田產資利隨所厚薄視親疎急難賑濟之不
復會校洛下多名園時與其弟觴詠終日陶然自娛
居閑古書真畫間或展閱其外紛紛過前不吾接也
嗚呼當少時父爲大官乘勢可進輒以書規切冀其
引罷仕及中年後有顯位可指而待輒棄爵祿人情
莫不好榮觀而厭卑處君豈異于人哉顧其中所存
者勝所爲故能安于所尚非天機淡泊動與道合者
惡能至是邪某與君昆仲游最久于葬之先君之弟
兩浙轉運使尚書刑部郎中集賢校理益柔狀君之
行以銘見託銘曰

大道之行人隱于天其德純明不居物先薄夫懷
貪生歿利勢扳躋勇前罔或畏耻嗟嗟夫君中年

雙溪集卷之六 忠惠公集卷之六 五
退休超離造化蕭散林丘高尚之節可監于後聲
名日遠于君何有

尚書屯田員外郎郭公墓誌銘

郭君諱之美字君錫世居廬陵自其考始以文詞舉
進士君錫少聰敏加人從其父學景祐元年年八與
其父同日登第仁宗皇帝臨軒賞其爽異為改今名
初調蘄州蘄春再授楚州淮陰皆為主簿以吏事不
申法去官慶曆三年為梧州司戶參軍□□□□年
復注惠州轉運使聞其名用之權韶州□□□□州

右鑄錢監監卒怨其監官是時儂智高叛輒請于監
軍韋貴曰願往邕州擒峒賊貴叱去之君策其必變
日叱之所以激之也陰為州備其夕監卒殺監官趨
州門斬關且進門有備兵出其不意格鬪誅斬略盡
儂智高入廣州肆兵外掠又移權知南海番禺二縣
募敢勇亡命之徒遇賊必戰殺獲甚多所至賊為之
縮斂蔣偕被命專討軍無法律遣使召君計事辭不
往後數日偕為賊擒皇祐五年以功除大理寺丞僉
書南雄州判官公事以父喪不行又丁母憂服除以

大理丞知交州萊蕪監嘉祐五年遷丞殿中監在京
豐濟倉賜緋魚天子卽位恩遷太常博士初作永昭
陵河南府素號窮空所費仰給三司時余爲三司使
薦君於永安入中錢糧計悉終以辨事時議稱之
改尚書屯田員外郎治平元年知開封府中牟縣縣
居京西一舍仍歲水災多盜賊賦歛頻數民益貧君
視其部中溝洫不治因上書乞治水嚴盜禁均賦役
朞月之間使客稱其畢給百姓頌其均平而不擾未
幾以命免仍坐舉故人之爲長吏者入官長吏有罪

追君一官罷去百姓條君善狀訴於京尹願留不得
卽遮丞相馬首叩頭噓唏幸少賜我旣又不得泣涕
而去明年歸蘄州未至終於舒州桐城之傳舍其孥
以喪歸十二月二十一日葬於蘄水龍潭山先人之
塋享年三十曾祖諱諫祖玠考諱佺□□□事推
官累贈太常博士妣施氏封安福郡君□□□娶程
氏再娶王氏男曰大時大明爲進士大昕大□與三
女皆幼好學多通理勢重輕之術每官必有記述皆
世之要用有文數十百篇尤善論兵數上書言慷慨

病且革歎曰丈夫固當以病死耶君之第之翰以書自斲至杭告余曰兄辱知於公今失官而死且葬矣公其哀憫其孤而銘其壙以慰存沒余爲之銘曰事而不試惠而不施古人有言世莫我知進焉而躓壽止於斯匪世之疾又將咎誰

尚書禮部侍郎鄭君墓誌銘

鄭君諱紆字武仲先世居秦曾祖諱休雍始居安陸客有寓錢數百萬而死他日得其子還之客子莫知所由辭不受遂施之浮屠氏於是湖湘之人稱其長

者祖諱嶼東頭供奉官嘗總兵秦隴間以數十騎入乘虜鄣虜畏其名考建中舉進士積學而多材能悉產以濟人急難故與游者多名人君承數世累義之美資性明敏所習過人初應明經以爲不足以自立曰吾豈誦數者又舉進士天聖八年登第注安州之應城簿越州司法叅軍改大理寺丞遷殿中丞歷知婺之蘭溪越之餘姚徙知益之新都貧不能行監楚之北神稅湖南安撫使王絲薦君爲簽書桂陽監判官聽公事權潭之長沙其縣喜訟難治君視其繁爲

簡其術如無一事劉丞相號爲明果時知
所爲大喜稱歎轉運使時其事叢臨縣觀
狀非其要不問問卽自陳雖得罪者亦喜躍而去柳
州宜章民持僞券奪人之田屢獄不直委君決之君
覽案曰義章以太宗舊名而更之市田之歲在義章
其券乃今宜章印也獄遂決三遷爲尚書都官員外
郎審刑院詳議官峒蠻儂智高寇邕州詔龍圖閣直
學士孫公沔往經制之辟君與行從招討使狄青破
高於邕州界是夜軍輒驚擾孫公謂君曰行者數

人多以事避去今獨君在此真義士也以勞受職方
權太理少卿君通春秋及爲法官多引律傳經酌理
叅讞有可矜者必爲之言殿直曹且監主自盜應成
君曰其父僕嘗戰歿仁宗聞之惻然爲減一等仁宗
恕寬哀矜令天下大辟有疑或情可憫者得以上聞
四方體朝廷好生之意率以情法遷就求爲未戒君
曰法正情直州郡當自決之今乃諉上以苟僥倖類
是者請置之法於是朝廷著令以班天下遷祠部郎
中嘉祐元年五月甲子卒于官壽五十有六累贈尚

書禮部侍郎喜讀書記其大旨以資職業比為審刑
大理以中道論法不為守文吏故所濟活甚眾為詩
有精思入唐人風格清峭可尚尤善章奏書牘諸公
或請之皆了其意而文彩蔚然祖妣傅氏妣楊氏天
水縣太君劉氏河間縣太君娶李氏汝南縣太君駕
部郎中文蔚之女今夫人鮑氏樂安郡太君其父
職方郎中男五人獮著佐佐郎知潭州攸□□□□
諫知制誥知荆南府猗將佺監主簿猛未□□□□
張蒙山以治平三年月日葬于安州安陵縣某鄉

與君為同年進士少嘗仕官往來數相遇於淮浙
間每見飲酒笑謔不休皇祐中司諫以文中科為天
下第一余嘗慶君曰子為狀元而其父固可知也用
是為適今援毫襞紙遂銘君壙遽至於是乎銘曰
材力之決要必有成文詞之敏煒燁敷榮傳經裁
讞區處和平世資以義用永厥聲屯于其躬來者
其亨坎中之紀後世之評

宋忠惠文集卷之三十六終

食

朱嘉大

十

Large stylized watermark or seal impression, possibly reading '國子監' (Guozijian).



